

四庫全書

集部

欽定四庫全書

御製文二集卷二十六

碑文

重修

歷代帝王廟碑文

歷代帝王之祀其準古遷廟觀德遺意而推而放之者
與書曰七世之廟可以觀德疏家以謂世祧者迭遷德
盛者弗毀盖就一朝為言而周禮鄭氏四類注稱三王

五帝九皇六十四氏咸祀之繁露引為自近邇遠之明證斯正合食所權輿然漢魏已來有司具儀率求之肇迹建都而不聞立廟洎唐迄明廟立而代以專祀開創為常其制又缺焉未備我

皇祖聖祖仁皇帝康熙六十一年

勅諭禮官增祀苟非失德失器即蒙業守成者皆得與饗我

皇考世宗憲皇帝丕續

先型詳定位次

臨御伊始

親詣視成著於

奎文者纂悉間考舊史所紀
初守難易之辨
斟有折衷
定論以是對揚
曩昔所為法施於民者
不克兼
既其實
獨斤斤於

殿於

門於

坊具顏之曰景德景德焉爾德故若是其偏而不舉耶
寅惟

祖

宗懋敬厥德咸秩孔修觀法之所存即知戒之所寓義
至深遠大雅不云乎天難忱斯不易維王召公奭迪王
祈天永命一則云監於有夏再則曰監於有殷寢假入
廟而徵統系由百世之後等百世之王一自昭代概之
皆名之為勝國有不深厯夫屋與墟之儆而怵惕動容

者哉顧於其間歷選

列辟若稽古之化浹烝人治光往牒者罔不穆穆棣棣
式在

几筵崇異代同堂之報故於世數之遷而得其示戒於
無形抑於世數之屢遷而不遷而得其垂法於有永稔
乎此者觀德之意愈以覃然而興矣

廟自雍正癸丑繕葺距今且三十載爰以乾隆壬午出
內帑金庀而飭之故事瓊甌甃以純綠茲特易蓋

正殿黃瓦用昭與工告訖功適屆甲申季春吉祀祇承

家法躬薦

新宮已為長律述事揭言其大指會所司請製文並鏤諸碑復詳闡之如此

寶相寺碑文

歲辛巳值

聖母皇太后七旬大慶爰奉

安輿詣五臺所以祝

釐也殊像寺在山之麓為瞻禮文殊初地妙相端嚴光
耀香界默識以歸既歸則心追手摹系以贊而勒之碑
香山南麓曩所規菩薩頂之寶諦寺在焉迺於寺右度
隙地出內府金錢飭具庀材營構蘭若視碑摹而象設
之金色莊嚴惟具惟肖寺之制甃甃幕園不施宗廟梓
稅而崇廣閎麗則視殊像有加經始於乾隆壬午春越
今丁亥春歲工既敬致辦香而慶落之所司礱石以俟

因記之曰文殊師利久住娑婆世界而應現說法則獨
在清涼山固華嚴品所謂東方世界中菩薩者也夫清
涼在畿輔之西而香山亦在京城之西然以清涼視香
山則香山為東若以竺乾視震旦則清涼香山又皆東
也是二山者不可言同何況云異矧陸元暢之答宣律
師曰文殊隨緣利見應變不窮是一是二在文殊本不
生分別見倘必執清涼為道場而不知香山之亦可為
道場則何異鑿井得泉而謂水專在是哉且昔之詣五

臺禮文殊所以祝

釐也而清涼距畿輔千餘里掖

輦行慶向惟三至焉若香山則去京城三十里而近歲
可一再至繼自今億萬年

延洪演乘茲惟其恒是則余建寺香山之初志也寺成
名之曰寶相綴以偈曰

曷殊室利

七佛之師

經歷人間

至福城東

東方世界

名曰金色

常在其中

而演說法

摩竭陀國

其東五峯

是名雪山

惟清涼境

金剛窟聚

北代州是

大士示現

妙相莊嚴

振大法輪

坐師子座

師子奮迅

具足神威

中臺現身

寺曰殊像

我昔瞻禮

發大宏願

虔誠祝

釐

普諸福緣

相好印心

如月在水

即幻即真

證真幻相

以此真幻

還印金容

香山淨域

多祇樹園

寶諦之西

營是寶相

莊校七寶

晃曜大千

日月月面

了無分別

我聞如是

文殊應緣

緣即隨緣

何有彼此

矧東西方

因見生名

見即不拘

名亦不著

清涼香山

非二非一

復念文殊

菩薩久住

而此世界

實曰常喜

以常以久

延祝

慈禧

惟願自今

歲萬又萬

寶算盈積

如恒河沙

護妙吉祥

生大歡喜

以是因緣

壽復無量

重修天津

海神廟碑文

渤海介析木之津襟帶畿輔捷雄關而翠之寔惟神京
左絡翕受靈長厥利斯溥

神故不列海瀆秩次康熙間盛京有汎舟之役衽波颶
颶厥事迅蕝我

皇祖嘉

神之功飭廟薦馨祀在彝典我

皇考詔即舊規重事葺治

豐碑並峙昭鑠瀛際宗示禮秩莫不備舉越歲既久風

雨剝彫無以揭虔妥靈乃發水衡鼎厥工楹輝腹新式
與式壯朕今春率

皇祖舊章巡幸天津莅而謁禮為詩以落之蓋自淀池
循子牙滸海河既得悉其歸墟原委至則登觀海之臺
澄波澶湍引控瀛棣東眺扶桑燿艷蔥鬱光延我陪都
而旅順登萊廟島環拱羅布胥靖以安其旁穿壕堦場
曝鹵出素邱如鴈如牢盆之獲什倍而斥壤沮洳瘠不
宜植於是蠲澤民之逋爰復憬然曰渤海之繫誠大矣

凡海職納而茲所職乎納者尤要夫東南之海吸吞江河風濤是防治在塘堰若西北諸水潯滄漳易衛白或奔瀉千百里而永定最橫且駛潴以七十二淀淪以三沽醞澹委輸厯直沽以入禹貢所謂同為逆河入海者此居其大半而崇沙外亘如戶斯闌無拒而壅流乃軌注曩者京南州邑苦積潦載洩載導田廬用寧邇復相示咨度渠之墊者濬之隄之缺者續之施人力靡弗至洎覽五牘春灌夏禁啟塞以時匪潮弗盈匪寒弗縮噓

喻迴幹通乎自然固非人事補苴之可作而致而朕飢
溺為念時罔不在民則因

天之功其又敢不事事且海之為物既鉅受川泄波有
宿有統與夫所以若雨暘迪節宣康乂我民人而惠阜
我田疇者咸依

神庥洪惟我

祖

宗懷柔報祀盱蠻昭融歷有年所朕勤思下氓計安恬

者甚摯亦惟

神是憑斷自今祇循儀軌宣道和令於以疏濶輯濶俾
暑無盛漲秋無靈霖用貽我甸人無疆之樂利嗣是百
執事歲有事於廟下醴芬膾膾無不恪共而

神之彰靈效順以宏佑我邦家者亦永永弗替爰系其
事於碑以示來許

普樂寺碑記

避暑山莊當興桓隄區直北地亘獅溝西南官解民廬

聚落殷美獨其東偏列嶂邈縣周原案衍則諸經所稱
廣長清淨於佛土宜乾隆乙亥西陲大功告成衛拉特
各部長來會時事嘗肖西域三摩耶建寺曰普寧嗣是
達什達瓦屬人內徙即次旅居環匝山麓越歲乙酉復
於迤左仿伊犁固爾札都綱建廟曰安遠然自廟南延
望錘峯式壇式閤厥壤猶隙惟大濛之俗素崇黃教將
欲因其教不易其俗緣初構而踵成之且每歲山莊秋
巡內外扎薩克覲光以來者肩摩踵接而新附之都爾

伯特及左右哈薩克東西布魯特亦宜有以遂其仰瞻
興其肅恭俾滿所欲無二心焉咨之章嘉國師云大藏
所載有上樂王佛乃持輪王佛化身居常東嚮洪濟羣
品必若外闢重闔疏三塗中翼廣殿後規闔城內疊磴
懸折而上置龕正與峯對者則人天咸遂皈仰將作如
制以丙戌正月經始洎丁亥八月訖工爰取普樂顏寺
額而為之記曰自西人之瀕於塗炭也湫隘阨危不能
終日朕則為之求寧焉既寧之後奔奏偕徠室家還定

朕則為之計安焉既寧且安其樂斯在譬如佛影覆於
鵲身四大得所離怖畏想生歡喜心斷自剎那以逮億
劫同遊春臺化宇樂其樂而不能名其樂真上樂耳雖
然曷易臻此哉語曰民可與樂成難與慮始又曰先天
下之憂而憂後天下之樂而樂是朕所由繼普寧安遠
而命之為普樂者既以自慰且重以自勗而匪直梵文
勝因福利之云云也記成并系以讚

善哉大能仁

無去亦無住

以何因緣故

現此說法身

人天咸護持

功德甚希有

云何稱上樂

自小千中千

暨三千大千

法界無究竟

爾時兩足尊

甘露為灌頂

一切諸衆生

若有情無情

念彼佛力者

受持陀羅尼

三世諸如來

神力並如汝

第一具根性

即身得證佛

其次小乘人

得八大成就

靈丹淨眼方

徹地智慧劍

空行遍周歷

延年無疾病

自洛叉俱胝

無量僧祇劫

萬行齊完滿

求福不唐捐

普種福德田

普蔭如意樹

普覆大慈雲

普渡大願船

震旦閻浮提

清寧共安隱

而彼狼荒俗

永脫修羅天

合十白佛言

此是法王力

要知大自在

本分元自足

無苦彊言樂

即墮分別相

樂故無名名

上亦無等等

東峯開妙鬘

寶閣照旭光

舉似日出處

了了正知見

光與日無盡

誰識所本來

八寶莊嚴成

香華天樂備

大會啟無遮

同證無上道

御製文二集卷二十六

欽定四庫全書

御製文二集卷二十七

碑文

重脩

文廟碑記

舉江淮河濟以贊海吾知其不知海舉嵩岱恒華以贊地吾知其不知地然則舉道德仁義以贊

孔子者其亦類於是乎夫江淮河濟豈不為海所納而

不足以形海之大然海固不拒江淮河濟以為水也嵩
岱恒華豈不為地所載而不足以究地之厚然地固不
讓嵩岱恒華以為土也道德仁義豈不為

孔子所垂而不足以盡

孔子之量然

孔子固不外道德仁義以為教也教之義始見於虞書
而未有定所夏校殷序周庠學則三代共之是國學所
昉乎夫三代既有學亦必有教而吾以為

孔子立道德仁義之教者何蓋三代以前之教非

孔子不明三代以後之教非

孔子不立亦猶江淮河濟非海不納嵩岱恒華非地不
載道德仁義非

孔子不垂也國學始於元太祖置

宣聖廟於燕京由元及明代有損益修葺至

本朝而崇奉規模為大備

列聖右文臨雍必事輪奐乾隆戊午朕詣學展儀先詔

易蓋黃瓦聿昭茂典然丹雘雖致飾壯觀而上棟下宇
風雨燥濕歷年既久浸歎是虞爰以歲丁亥發帑二十
餘萬特簡重臣司其事越己丑仲春告歲工朕親釋奠
以落成焉先是言臣有以宜乘此時修復辟雍園水之
制為請者禮官以為三代之制弗相沿襲實政不必泥
古朕以其言良是遂從之門殿諸額一準會典皆親書
各懸於其所舉大工者必泐碑以誌故叙其事書之若
夫述

孔子之言仍以頌

孔子是猶繪日月星辰以象

天朕有所不能

淀神廟碑記

畿南之地廣衍多隰衆水所鍾翕之渟之呀然成淵而
以時輸壑者則惟淀淀之名始見於左思魏都賦所謂
掘鯉之淀是也字亦為澱水經注新唐書志皆云九十
九澱酈道元又稱為清河後世約其數為七十有二其

名皆不可臚舉其散見宋遼金史者今或淤廢或傳聞
譌舛所可指者不過四十餘其他或曰泊曰窪曰窩曰
港隨方俗所稱而統言之則東西兩淀西淀之大周三
百餘里棹州一縣四東淀尤大周四百里而羸棹州縣
七其為數澤也廣故畿內之水大則沽渝濡涖派滋易
涑小則山泉澗流無所不容而旁境之溝澮汙潴亦無
所不赴其受水多故兩淀又各有經河以條貫醜導之
依城溫義亢其首四角引其吭玉帶會同緣其督扼以

茅灣掖以中亭十望絡以南北中三股欽於臺頭滌於
大清河趨西沽為尾閭之洩焉其上則千里長隄控界
維輦下則格淀隄以拒子牙六郎諸隄以障永定而牖
而涵洞羅布節宣者無弗具於是兩淀無渾流之患而
專清水之利黍疇稻畦既膏既溉厥惟上腴舟航是通貿
遷列隧而菰蘆菱藕鳬魚之屬仰資生者億計非有宰
其化者孰使我民利賴若是記有之山林川谷為民取
財用皆曰神蓋淀之有神昭昭矣人第習焉不察廟闕

未舉歲丁亥朕敬循

皇祖成憲巡覽浞海爰自趙北口御安福臚沿蘇橋而
東歷揚芬港至於天津嘉文安窪之既涸懲渾河故道
之不可復則有詠而三灘里浞隄之弗屬者出帑繕之
亦惟紹戎

祖烈以求民寧維時春水方渙和颺習颿烝徒弗勦繫
川祗實昭厥佑爰進大吏詔之曰惟浞縈薄左輔裒延
且千里理大物博用阜乂我畿內民曷可弗重以神事

其相地飭祠用饗迺發外府金二萬五千卜度兩浚中
庀材經始之閱再朞工歲堂廡既宗輝庖咸列以妥以
恪式副彝典大吏復籲以明年春蒞而落之且以碑辭
請則又繹告之曰惟浚實嘉利我甸人匪今斯今食
神之福而浚左右耆庶婦孺歲時祈報走廟下則自今
始

神實馮而歆之惟是毋靈毋潦毋有菑沴豐殖錫康俾
我民其永利利用光我秩祀有司亦毋怠祠事毋弛民

功益迺

神惠而溥浚之利識其詳謹肇祀也

重修功德寺碑記

道海從徑青龍橋折而西距玉泉山麓不盡於二里有遺刹一區重門三塗不可識已延睇香積頽垣離立芳芟間訊諸土人曰是功德寺也攷元史文宗天歷二年建大承天護聖寺而都穆南濠集稱功德寺舊名護聖寺蔣葵長安客話載寺修於明宣德初及嘉靖中車駕

駐此見廊廡金剛像獰甚心悸因坐僧宮殿懋踰罪撤
去之寺竟廢豔怪哉有明閹豸滋熾若瑾振輩橫作罔
禁顧獨毀茲寺使勝國名蹟就湮於意何居爰詔將作
茲寺久著圖誌且當靜明園蹕途乃者歲庚寅為朕六
袞慶辰越辛卯恭逢

聖母皇太后八旬萬壽聖節宜加釐飭用迓鴻禧其出
內帑繕而復之暨所司以落成告則材緻工完自層闥
周阿登登戢戢以逮櫺楔鐘魚靡弗嚴淨具足夫其臂倚

欽岑梅檀蔚森迦陵轉梵六時送音非功德之林耶面
俯湖堧神漢齋滌耨池分罪條衣水田非功德之泉耶
然而朕之記之詎惟在是貝夾嘗言以茲功德無量無
邊必進而讚之曰不可思議夫不可思不可議者特從
其波及一四天下一切衆生隨分圓滿未由舉似而為
言耳其在能仁有建立之功有精進之德固無一息不
心之以為願而身之以為行無量壽佛經所以有善思
議菩薩之目又豈容委之不關思議輒自弛其擔荷哉

正如古帝者致巍乎煥乎之盛美持不矜不伐之淵冲
其功德至於民無能名而方其食旰衣宵常於一堂命
禮樂工虞之佐吁咈都兪相與動色而交儆凡皆起於
思之精議之熟而後不識不知被之者亦並忘乎思議
其為無量無邊也以証帝釋真詮亦若是則已矣斯尤
其可記者至虞集寺碑謂始作土功時得古金銅事佛
儀器於地中以為先有密契帝京景物畧謂寺僧板庵能
役木隸使者出外募金直襲唐咸通中正覺禪師軼事

傳會其說蓋皆誇功德而涉思議其義轉墮又奚足云
普陀宗乘之廟碑文

山莊迤北普陀宗乘之廟之建仿西藏非仿南海也南海普陀在浙東定海縣境朝山之舶歲歲凌越洪濤瀾泐間擎薌頂禮唯謹曰大士道場舍茲奚屬是獨震旦緇流方隅所見故然考之貝夾普陀有三一居額訥特珂克一居圖伯特一居南海蓋南海特大士行教至此偶一示現云耳庸可以此為是而彼為非乎額訥特珂

克即印度是由此以證西來因緣自印度而西藏自西藏而南海了了可識第印度金剛座遼遠難稽詎若西藏都綱法式具備為天人攝受之閼規藩服皈依之總匯也哉乃者歲庚寅為朕六袞慶辰辛卯恭遇

聖母皇太后八旬萬壽自舊隸蒙古喀爾喀青海王公台吉等暨新附準部回城衆蕃長聯軫偕來臚歡祝

嘏念所以昭褒荅示惠懷者前期咨將作營構斯廟以乾隆三十二年三月經始至三十六年八月訖工廣殿

重臺穹亭翼廡爰逮陶范斤鑿金碧髹堊之用莫不嚴
淨如制夫羣藩信心迴向厥惟大慈氏之教而熱河尤
我

皇祖聖祖仁皇帝撫綏列服歲時肆覲之區嚮也西陲
內風景從朕勤思續述普寧安遠普樂諸刹所謂嗣溥
仁溥善而作也今也逢國大慶延洪曼羨而斯廟聿成
三乘之宗實其統會於焉宣寶鐸演金輪闢禽流梵樂
之音塞樹種菩提之果一切國土善信膜拜歡喜以為

得未曾有而久入俄羅斯之土爾扈特以其為外道非
黃教所概舍久牧之額濟勒率全部數萬人歷半年餘
行萬有數千里傾心歸順適于是時蒞止瞻仰善因福
果誠有不可思議者是則山莊之普陀與西藏之普陀
一如與印度之普陀亦一如與南海之普陀亦何必不
一如然一推溯夫建廟所由來而如不如又均可毋論
即如如之本義豈外是乎豈外是乎先是羣藩合辭請
進千佛像懇款弗可却因命就廟中度閣奉之別有記

不復詳綴為說偈曰

我聞瞻部洲

古德有道場

天龍各護持

名四大結聚

九華及二峨

五臺亦初地

普陀南海南

觀自在所住

其言限方所

不出邊邪見

譬如一搥手

昧萬億由旬

若人證三摩

要令不失故

衛藏妙莊嚴

竺乾祖庭意

興桓足香界

成此大勝因

百部諸賢王

合十聆頌讚

塞土黃金色

是處菩薩面

其前羅漢峯

磬石為捷椎

舉似象王巖

非離亦非即

其下獅子溝

武列功德水

舉似鐵蓮洋

無垢亦無淨

能具等正覺

皆作如是觀

五十三參竟

還叩兩足尊

長現調御相

為說無生法

重修馬駒橋碑文

水自南苑出者二其南源曰團河出南苑牆東南醜為
鳳河又東滌永定之濁由大清河以歸海向固疏治之

矣其北源曰一畝泉出新衙門北屈曲東南流逕二牖
凉水河自北來會之凉水河者出右安門西南鳳泉東
流逕萬泉寺分為二其一南逕草橋曲折東注一自北
逕廣恩寺曲折東注至永勝橋復匯為一東南流循南
苑繚垣而東至小紅門之西入苑牆東南逕沙底橋折
而南與一畝泉合又南而東至鹿圈村三海子以上之
水自西南來注之又東南流穿苑垣而出逶迤至張家
灣入運河是水之初出苑垣也滌演歆飲千溜一趨瓊

如矢如迴激弗止則有巨梁捷之曰馬駒橋橋建自勝
國歲渝寢以圯壞農旅交病石阨入水水梗或溢出妨
民田廬而中濫則旁淤間塞水所由道益不可以不亟
治乃命將作相視因其舊材撤而新之縱之得丈二十
有五橫之得尺亦二十有五為孔洞者七視昔制雖少
隤而壯固有餘工始於乾隆三十八年之春越其冬落
成夫治水者必溯其源由源而及其支流條派剔之鬚
之乃可以不紊今一畝泉源委既已剗治而涼水河所

逕漫流積潦復成沮洳爰自鳳泉至馬駒橋濬河八千
餘丈修葺橋閘凡九新建牖五即以濬河之土於右安
門外築甬道一千餘丈以便行人其河旁稻田數十頃
既墾且闢益資灌溉之利而茲橋實下游關鍵暢尾閘
以利導之尤施功之弗可已者若前代著述家睽視臆
論妄以玉泉傳合南海子之水舛錯糾紛至可嗤笑曩
賦海子行曾詳著其說茲因所司請記復為詮叙水道
大畧俾方來圖經輿記知所考據而若河若塗若橋皆

王政之大端所繫綦鉅毋廢毋墜誠有司所當務書之
碑用示來許

御製文二集卷二十七

欽定四庫全書

御製文二集卷二十八

碑文

平定兩金川告成太學碑文

太上立德其次立功又其次為立言而德與功皆賴言以傳言之無文行而不遠文之時義大矣哉然傳德之辭直而寡傳功之辭費而多直而寡者不因文而德自見二典三謨經世立教是也費而多者必因文而功乃

明周誥殷盤佶屈聱牙是也吾嘗讀韓昌黎平淮西碑
益恚此言之不與何則彼其藩鎮乃家奴之類憊患因
循以致宛成敵國削而平之是宜引以為愧而不可炫
以為功賴昌黎之文幾與江漢常武同稱者定然有識
者固知其辭費而多飾而未知憲宗之愧與弗愧耳今
之平定金川之文不有類于斯乎解之者曰逆首羈縻
徼外非若淮蔡之居中土元濟之為世臣也吾則以為
既已受職為土司則是我臣而其地近接成都遠連衛

藏則是我土我土我臣而橫生逆志蠱食鄰封將欲大
有所為弗勦而滅之則西川將不能安枕茲雖歲事與
平定淮蔡擒吳元濟何以異故宜引以為愧而不可炫
以為功者以此金川之始見於己己告功之文茲不復
記記其復叛而復征則其陰謀負恩己自戊寅年始蓋
戊辰之師實緣其跳梁不靖而師既臨境彼即窮蹙乞
降遂以赦罪頒師甫十年而其酋郎卡即與革布什咱
構釁又四年遂與綽斯甲布及三襍谷為敵而逆子索

諾木允恃益甚自恃地廣人衆力强與各土司構兵訖
無寧歲故各土司皆畏之如席而以勢分力散又莫能
如之何余以為業已受其降不宜復加兵且蟻鬪蠻觸
不足以勞王師因命地方文武大吏隨宜彈壓令弗越
內地界亦足以安民而示度耳不虞地方大吏欲息事
而每示寬逆酋轉以為無足懼而日益逞其小金川逆
酋僧格桑者始則與索諾木水火相仇繼乃狼狽為奸
於是索諾木計殺革布什咱土司色楞敦多布取其印

勅以歸而僧格桑亦侵佔鄂克什地界且發兵圍其土
司色達拉之官寨期于必取總督阿爾泰提督董天弼
知事不可掩乃有發兵之請是役也或咎阿爾泰依韋
誤事之過而余則以為阿爾泰之過皆余之過蓋金川

因其地險衆悍久蓄異志是以有殺至維州橋之謠

維州

本漢徼外羌丹驍地蜀將姜維征羌駐此築壘後因名
為姜維城唐武德初因其地置維州屢叛屢復廣德中
陷吐蕃號為無憂城遂累入寇擾大中時始復內附五
代蜀州內徙改縣曰保寧宋景德初改曰威州元至元
間以州治保寧縣并入明洪武初于州境析置保縣
本朝雍正五年省威州入保縣屬茂州今其地尚有維

州橋之稱而促浸者人以殺至維州橋搆則其不忘內
為譟曲似係聞吐蕃舊事妄冀效尤耳

地情率可知戊辰之役我師深入屢勝即不宜赦其罪
而受其降此一誤也甫十年而郎卡偕恩作亂以及逆
子踵其蹟皆不即發兵問罪惟令地方大吏隨宜處置
又屢誤也以至尾大不掉終於興師故予不咎人之議
為窮兵黷武而轉咎己之類于姑息養奸蓋中國之制
外域張撻伐則彼畏而斂跡主和好則彼輕而生心漢
唐宋明之覆轍率可鑒也若謂予窮兵黷武則予賴

天恩平伊犁定回部拓疆二萬餘里豈其尚不知止足而欲滅蕞爾之金川以為揚赫濯紀勲烈之圖哉雖然平伊犁定回部其事大矣然費帑不及三千萬成功不過五年茲兩金川小寇地不逾五百里人不滿三萬衆而費帑至七千萬成功亦遲至五年則以跬步皆險畚奴効命死守故得延至今日而我將軍阿桂立志堅定決機明敏兩副將軍及叅贊領隊諸臣同心合力各軍士敵愾奮勇凡經大小數百餘戰而後成功視平伊犁

定回部費力轉不啻倍蓰設非

天恩助順衆志成城則金川未易言滅而國威或致少
損矣是不可以不記觀斯文者尚諒予懷慙悔過之不
暇知非稱功誦德而為言其庶幾乎繫之以辭用誌始
末云爾

小金首禍曰僧格桑兵救鄂什

向稱沃日今定為鄂克什急呼之則鄂什也

竟抗顏行

僧格桑于庚寅夏與鄂克什土司搆怨稱兵阿爾泰董天弼親往誠諭奏稱逆酋遵教退

歸亦遂釋而不問未數月復圍鄂克什辛卯夏阿爾泰乃遣兵護鄂克什而逆酋亦遂與官兵交戰督臣

提臣每事遷就知弗勝任將軍別授阿爾泰等名為進兵仍思遷就完事

因諭溫福由滇赴川經理軍務且命桂林馳往視之辛卯冬因阿爾泰始終遲疑玩誤遂罷其職而以溫福代為大學士授定邊將軍由西路督兵進攻其四川總督則令桂林代之統兵攻勦南路攻破巴朗

向訛為班直取達圍進抵資哩數月克之兩路夾擊遂

得美諾鼠竄狼奔金川助惡溫福初至西路即策勵將士攻克巴朗拉乘勝直取

達圍進攻資哩數月而克之繼命豐昇額為副將軍同溫福進勦賊尋退還木蘭坝我兵進抵路頂宗桂林在南路其始頗合機宜連破約咱卡了諸寨并復革布什咱侵地尋為宋元俊所誤致有墨壘溝之失桂林匿不上聞為阿爾泰所劾因即罷斥而令阿桂為副將軍赴南路代領其兵南路自達烏至僧格宗皆峭壁懸崖礪

卡林立阿桂董飭官軍勵勇摧堅深入其阻乘勝進搆
美諾賊巢壬辰十一月遂克之溫福亦攻克明郭宗至
美諾與阿桂會復督兵攻取布朗郭宗逆酋由僻徑竄
入金川擒其父澤旺解京乃傳檄撫定汗牛大板昭等
寨落小金川悲平而金川逆酋索諾
木復敢黨飛拒命因移兵並勦之
既平趙拉小金川
番語本

名遂討促浸

即金川
番語名

雪多境險奏功以沈奏功以沈賊

更遮却綠營怯懦遇戰辟易

攻勦促浸之兵溫福由功
噶爾拉阿桂由當噶爾拉

分兩路並進功噶之前為卡撒了口賊寨礮斷徑不能
進遂別由背嶺繞攻而礮堅地險兼多雨雪攻之半年
雖屢得賊卡終未扼其要害綠旗兵既懦憊溫福又不
善調度以二萬餘人散佈各卡防守遂以分而見單賊
窺其罅隙于癸巳六月遣耆衆數百由間道潛出煽誘
趙拉降者復叛董天弼庸懦失守為賊所戕賊益猖獗

援溫福後路直侵大營綠營兵衆先潰將領戰歿者多
溫福率親兵與賊搏戰亦遇害趙拉之地復失逆首等
罪大惡極愈兵既無能將復失算豈如南路全師而返
不可寬矣

叶阿桂在當噶軍律明而士心固賊不敢犯然木果
木有事之後當噶亦難獨駐遂整勵兵衆由南路全師
出而重調勁旅吉林索倫健銳火器其心忠純前已簡派
八旗兵三

千令赴川助勦為溫福等奏止使木果木軍營有滿洲
兵在彼則綠營得所依恃亦不致倉皇潰竄是其事仍
由溫福自誤幸阿桂一路軍氣甚整即授為定西將軍
並選健銳火器營兵三千吉林索倫黑龍江兵四千迅
赴軍營重仍分兩路堂堂正正不旬日間美諾重定癸

冬將軍阿桂統兵由西路進攻其南路則令明亮為副
將軍進勦兩路並進所向克捷旬日之間即收復小金

川全 谷噶既入馬尼去聲並克麥養旗兵允得其力阿桂等於

甲午正月擒佔谷噶了口山梁明亮等亦於是時攻克馬尼兩路之兵皆因有八旗勁旅奮勇先登緝營觀感激勸皆效法恐醜三路進一阻宜喜及彼絨布遇險而後奏績甚速

止副將軍豐昇額同舒常於宜喜駐兵與阿桂明亮共成三路第宜喜之兵攻勦半載未能寸進而明亮則

由馬尼攻得木谿卡卡角及抵庚額特亦阻險未能進遂駐絨布寨阿桂西路則屢建功

羅博湖普建遜克宗甲午三月阿桂攻克羅博瓦山梁六月攻克色湖普此諸寨並峯峻

硯堅賊衆悉力死守官軍皆涉險銳攻殲醜甚衆遂臨遜克爾宗喇穆山梁日則丫口

舉默格爾以擾其後我兵攻克色湖普後賊衆防守益力阿桂偵知喇穆喇穆迤西峯厓

陟削賊備禦稍疎因分兵起越進攻盡據其碉並攻克日則了口亦六月中事其後兵進稍阻至十月初復繞道攻得默格爾山梁其榮噶爾博日爾八當噶之賊皆截于後

明亮宜喜亦據嶺梁而

復難進徒然望洋

宜喜為賊要隘守禦極嚴豐昇額舒常攻之一年未下繼而命豐昇額改

赴西路舒常在彼更不能進甲午夏因明亮在絨布屢攻未進不宜頓兵於無用之地令其分兵七千移攻正地明亮遣偵卒往探不見賊蹤難以輕進亦赴西路協勒阿桂札止之會綽斯甲布土司懇明亮駐宜喜并願効前驅明亮乃出其不意分兵冒雨直進遂據宜喜山梁並攻得俄坡格勒古賊因掘濠斷路明亮等復為所阻

逮昨乙未略康薩爾木思工噶賊碉並毀

阿桂自攻得默格爾

欲乘勝直進賊復於康薩爾山梁抗拒兩月餘乙未正月阿桂派兵分路潛進拔其鹿角連越重壕躍上碉頂

遂毀其碉礮賊甚衆四月復攻得木
思工噶克了口從此下壓勢益順矣
明亮河西亦有所

據日旁以前五十里路

明亮因達爾圖之路為賊所斷
商之阿桂謂當仍由宜喜一路

進攻並派西路兵一千令福康安帶往攻克甲索碉卡
海蘭察亦往會攻合力并擊先克撒撒谷其日旁右之
沙壩山并達爾圖得楞及溝內之斯年木咱爾各
賊皆紛紛棄碉遁周圍五十餘里寨落悉行焚燒
夾河

兩軍聲息可通並清後路避克爾宗

五月中明亮攻克
額爾替碉卡可下

至平坡六月間復攻克石真噶寨阿桂派兵沿河從赤
爾寨攻打隔河之沙爾尼一帶兩岸夾擊聲息可通迨
阿桂攻得噶爾丹喇嘛寺等處居高得勢以避克爾宗
在我兵之後留之非計遂派兵三路分進豐昇額督率
攻勦或斫寨而入或梯牆而進遂
得其碉殺賊無算後路益肅清矣
舊則大海昆色拉枯

層層破要步步披嘔

阿桂以昆色爾喇嘛寺在拉枯喇嘛寺之上於此路尤為扼要其舊

則大海亦當並勦分派將領統兵同往其昆色爾山梁最險官兵皆蟻附上攻佔其碉寨復縱火焚燒拉枯喇嘛寺又攻得舊則大海官兵無不超越而登飛騰而入遂克勒圍紅旗飛遞而何

四月大捷未至既克西里迺建瓴科布曲索隆古不

日而傾

阿桂于八月十五夜攻克勒烏圍其附近碉卡木城六十餘處一夕無不摧破八日而紅旗遞

至木蘭詳見聞捷凱歌及誌事詩自奏捷後四閱月雖時有克獲未能深入直至十一月初攻克西里軍聲愈壯而賊勢愈感尋即攻得科布曲索隆古山梁並克格隆古兜窩等要隘又掃清安布魯木一帶益據建瓴之勢雍中舍齊易如拉朽密圍噶喇依賊其奚走阿桂既由索隆

古進攻朗阿古則朗噶克丫口等處皆克之並據噶占
山梁十二月十七日遂由瑪爾古當噶一帶寨落悉行
掃蕩並克舍齊喇嘛寺次日復攻克雍中喇嘛寺即于
十九日統兵直搗噶喇依四面圍攻水陸俱斷促浸番
衆自攻克勒烏圍以來大小男婦紛紛投出其大頭人
布籠普阿納木達什阿庫魯等遂皆相率乞降並索諾
木之母阿倉姑阿青及其姊妹亦皆投至軍營僉云索
諾木莎羅奔兄弟并作惡之大頭人丹巴沃雜爾等皆
在圍中此蓋逆酋賊黨等罪孽深重
天奪其魄驅之一處以就擒也
是時河西明亮亦

入富德馬邦傳檄芥拾

明亮既克阿爾古等寨克取獨
古木開通乃當山梁並搗甲襍

掃獨松河西一帶悉行勦洗過河會阿桂合攻賊巢富
德亦將河南北之噶咱普庚額特曾達等各寨落全行
掃清直據馬爾邦亦遣兵與阿桂會富
德所得之地俱不煩兵力易如拾芥
設非西路圍噶

喇依則其兩路亦無進期

明亮富德兩路向皆艱于攻取而富德久駐緘布尤未能

寸進自阿桂既克索隆古乘勝席捲已圍噶喇依各處之賊皆膽破心散望風潰降非果由力戰而得若非西路官兵直搗賊巢則明亮富德兩路仍未有進取之期也諸軍既合火攻周遭雖據

三穴訖其奚逃然猶死守四十餘日計窮力竭乞命而

出

官軍四面合圍賊猶負隅力抗繼用大礮環轟摧其礮卡將士等乘勢克取旁近寨落層層進逼賊日

多逆首惶懼遣其兄岡達克彭楚克次第詣營並即拘繫于是攻圍益急據其近礮斷其水道索諾木窘迫無計遂于二月初四日早率其兄弟莎羅奔甲爾瓦沃禰爾斯丹巴并兩土婦及黨惡大頭人丹巴沃禰爾阿木魯綽窩斯甲尼瑪噶喇克巴並兩喇嘛挈大小頭目男婦二千餘人出寨逆首跪捧印信乞免誅戮因即悲就

擒獲俘獻京師自圍勦以來計四十餘日至是全境蕩
平罪人斯得紅旗于二月十二日馳至桃花寺行宮適

當告功

東陵之期此實仰賴

皇祖默佑益深

感敬隨諭

將軍阿桂等統成功將士擇日凱旋俟東巡

迴蹕至黃新莊舉行郊勞
大典以昭偃武策勲之盛

金川之功阿桂居首特恩異

數加之宜厚

征勦金川之役實由將軍阿桂蓋誠體國
不憚艱勞制勝運籌克成偉績寔為此事

首功特封為頭等誠謀英勇公加賞雙眼花翎
紅寶石帽頂四團龍補褂金黃帶紫轡以昭崇獎


能出

能入有權有經運長擊短後實先聲金川之功允資羣

力寸步層峰冰滑石灰將軍指揮無不奮勇以此破敵

鹿埕隴種金川之功非予所期事弗可已久而得之關

猶獸困捨懲難肋念我衆勞至今心惻金川之功允賴
上蒼靖彼蕃徼我武惟揚勒碑太學用遵成例靜言思
之文以誌愧



御製文二集卷二十八

欽定四庫全書

集部

御製文二集卷二十九至三十二

編修臣錢樾覆勘

武英殿纂修侍講學士臣吳璥

欽定四庫全書

御製文二集卷二十九

碑文

平定金川勒銘美諾之碑

首禍者必有奇禍之遭，偕德者必有凶德之報。蓋儼拉之首禍，實由促浸之教，而促浸之偕德，亦因儼拉之肇。

故戊辰之役，以救儼拉而有促浸之征。

前因金川侵擾小金川拘其土

司澤旺地方官諭之不從，輒敢干抗。戊辰冬，遣經畧大學士傅恒統禁旅往勸我武，方揚而莎羅奔、郎卡窮蹙。

乞命因矜其頑蠢遂允受降澤旺乃得復歸故地郎卡始尚畏懼歛跡未十年輒思吞噬隣封時相仇殺彼時以蠻觸爭衡乃其常事亦遂聽之郎卡既死其子索諾木轉與小金川僧格桑狼狽為奸負恩梗化遂致復勞師旅深悔前此之姑息矣茲辛卯之師以伐僭拉乃並促浸而掃僧桑恃有索諾木黨惡欺蔑隣疆攻圍鄂克什官寨佔其境地羈其土司經前督臣阿爾泰等往諭罷兵退地逆酋陽奉陰違浸至辛卯夏僧格桑乘索諾木侵害革布什咱土司之釁益復滋橫並且修築碉卡謀抗天朝勢不得不加以兵革而阿爾泰因循貽誤遂命溫福由滇入蜀授以大學士統兵征勦即攻克巴朗拉繼又克復達圍一帶以至資哩官兵前抵路頂宗仍不能進壬辰夏阿桂以叅贊赴南路統兵於是年冬攻克僧格宗甫半月即垂勝攻得美諾其餘寨落悉傳檄撫定小金川平而僧格桑逃往金川索諾木匿而不獻於是移兵並討

促浸

彼其緩則頡利突利之相猜急則僞如榮如之相

保然而地險人強機謀深造則儼拉遠不如促浸故美

諾再入而再克

美諾未嘗不險而一克僧格桑初竄布朗郭宗溫如破竹逆酋僧格桑已從美卧溝遁入金川

福由明郭宗統兵往捕僧格桑已從美卧溝遁入金川擒其父澤旺以歸溫福為將軍始猶勇往繼乃昧於籌

畫又不得人心癸巳夏賊衆從後路潛出遂有木果木之變美諾亦尋失去乃命阿桂為定西將軍發八旗勁

旅往勦阿桂部署稍定於十月廿九日進兵自資哩至美諾五晝夜悉行恢復實為神速而僧格桑既至金川

索諾木即羈留不遣即其謀擾木果木但令小金川賊目七圖安堵爾同往美諾號召而不使僧格桑復還故

巢則索諾木之密圖吞併儼拉以次蠶食旁近土司并且欲侵及內地固已漸露端倪罪惡貫盈實難輕逭耳

雖南有僧格宗北有明郭宗而我師奮力攻取無不立

摧堅碉遂據官寨之穴窖

美諾為小金川官寨即其巢穴也

此固

皇天助順將卒盡力而亦其首禍偕德之招是用勒銘

酋巢永鎮箝徼

平定金川勒銘烏圍之碑

美諾既克移問促浸狼狽為奸而更謀深劫水果木

壬

辰冬攻克美諾逆酋僧格桑竄去索諾木匿而不獻於是移兵申討促浸時溫福為將軍由功噶爾拉進剿阿桂為參贊大臣由當噶爾拉進剿溫福旋攻據昔嶺遂駐水果木師久不得進溫福絀於謀以營中所有之兵

築卡布守既耗兵力且以分而見少癸巳夏賊酋窺其
無能乃逞狡謀令賊目糾衆自美卧溝及大板昭潛出
號召僭拉降番復叛擾木果木後路溫福福漫無部署軍
營為賊所劫綠營怯兵一時俱潰溫福被害其餘大臣
官員兵丁陣亡者甚多我朝用兵其恨至今將士何辜
從無如此挫折者思之實堪切齒

弗雪冤沉兵威大振勁旅繼至師分兩路谷噶馬尼去聲

木果木之失皆由營中無滿洲兵為之表率亦由溫
福等奏阻故已派而未遣及溫福既僨事知綠旗兵之
終不足恃乃派健銳火繩營兵二千吉林兵二千索倫
黑龍江兵二千並派西安荆州駐防滿兵四千前往以
為之倡又添派陝甘滇黔兩湖精銳數萬合力大舉以
阿桂為定西將軍豐昇額明亮為副將軍阿桂遂統八
旗勁旅閱五晝夜而恢復僭拉全境乃進攻促浸甲午
正月阿桂自西路攻克谷噶了口佔其山梁入賊境百

餘里明亮亦自南路攻克馬尼此為再進克捷之始軍聲大振

上下同心據忠敵愾西

路遂進南路畧泥

去聲勒烏圍從西路進攻噶喇依

遂能扼要所進據皆其險隘明亮等既得馬尼雖時有小捷然庚額特馬邦俱未易攻進於是遂專望西路之

得手

丫口深入爰克羅博

阿桂自丫口進兵以羅博瓦為賊人緊要門戶因派兵五

路分將令率之超越而登遂將羅博瓦山峯及山岡礮卡盡行攻克

喇穆喇穆併占默格

叶阿桂自三月間攻得羅博瓦阻雨數月至六月初稍晴遂克其岡下之色溯普又於六月下旬盡克喇穆

喇穆山梁及日則丫口七月中又克其該布達什諾大水城并焚燒格魯瓦角寨落十月中復佔其默格爾山

梁其地在日爾八當噶之下榮噶爾博之上向閱地圖指以諮詢阿桂而所籌適相合既佔此山梁遂克密拉

噶拉木大寨並克獲凱立獲康薩爾木思工噶叶阿

桂自十

月攻得默格爾駐兵密拉噶拉木幾兩月餘至乙未正月十二日官兵乃攻克康薩爾山梁其險倍於他處賊之守禦亦更堅而官軍於三日內全得之其後復因雨雪頓兵三月至四月初十日天霽雪消十四日中夜官兵潛進攻奪木思工噶克了口阿桂自遜克爾宗其險謂一日而收三年未竟之功洵不妄也

難託

遜克爾宗為勒烏圍賊巢外險自前歲四月間攻之經年未克阿桂自得木思工噶克了口之後於

五月初攻克噶爾丹喇嘛寺及噶朗噶又搶佔舍圖枉卡已居高得勢而留遜克爾宗在後究屬非計乃於五月十二派兵前往時霧氣四塞官軍乘勢攀越崖礪直至礪根遂將其地上下石礪木城悉行攻克是役也豐昇額之力居多因於其公號果毅下增繼凡此數處林勇二字嘉其能紹乃祖額亦都之績也

立堅碉層次攻勦我師實勞據昆色爾乃近賊巢北軍

亦至隔河匪遙

七月初二日官軍乘夜潛進直上昆色爾山梁蟻附登碉立時攻克初四夜官

軍縱火焚賊寨至拉枯喇嘛寺飛騰而入又得喇嘛料爾三寨並攻克苗則大海竭三日三夜之力占地縱橫三四

十里焚其碉寨一百三十餘先是明亮在南路以其株守無益令移兵北路會勦甫至宜喜即得達爾圖山梁至是復由茹寨攻進連克額爾替石真噶等寨盡得其上下沙爾尼之地與阿桂軍營僅一河之隔矣 曰

勒烏圍賊舊官寨垣固碉高力守要害經樓輔車陡礮

劃界木卡石城蠶簇鱗繪拏柵周遭援路截其泗水拽

橋囊土濟師

勒烏圍為賊舊巢恃其碉高牆厚守拒甚力且有轉經樓相倚角中間碉卡鱗次又

阻以高礮五層殊不易攻阿桂於勒烏圍轉經樓之中
擊柵以截賊人援路並令冷角寺一帶官兵由西北而
南沿河擊柵以斷其下水之路又募楚兵善泅水者繫
巨索於甲爾日礮橋柱以拽圮之又以礮邊賊人鎗石
可及官軍頭戴柴捆手推沙囊匍匐而行至礮
沿層積推起趕列三層木柵以擊礮下之賊穴道旁

出轟以地雷

叶

凡此百計用盡無遺

並於所掘地道中
用礮轟擊礮下掘

溝抗拒賊衆凡可以用力設法者
籌畫備至阿桂可謂善於謀矣

四面礮攻礮摧垣裂

遂督大軍斫牆衝關遊魂弗支奔迸躉躄功成一夕中

秋八月

官軍四面合圍礮轟鎗擊並拋擲火彈所遇礮
卡或拔柵斬關而入或攀援奮躍而登呼聲四

起賊衆披靡殲戮殆盡惟莎羅奔兄弟及賊目丹巴沃
離爾聞風先竄究亦難逃

天網計亥子丑三時將

勒烏圍官寨轉經樓喇嘛寺悉行攻克凡賊所恃以抗拒之處一夕無不摧破時乙未八月十五夜也衆

軍之力一帥之謀靖彼賊穴安我蜀陬肫乎厥忠卓乎厥猷銘志鴻功永示千秋

平定金川勒銘噶喇依之碑

向不云乎弗加征而自臣屬謂之歸順始逆命而終徠服謂之歸降若今索諾木之窮蹙率兄弟出碣獻印不但不可謂之歸順即歸降亦不可得而方彼其抗命相拒歷五年之長茲已密圍巢穴火器圍攻腹心潰內羽

翼失傍

官軍初圍賊巢蟻衆猶負嵎抗拒我兵用大礮四面環擊賊自揣力不能支日形窘迫先是逆

酋之母姑姊妹情急來投自請遣人回巢招諭索諾木乃遣其兄剛達克彭楚克以次詣營懇求皆就拘繫其黨惡之布籠普阿納木等先後求降山塔爾薩木坦等並經擒獲於是進圍益急賊勢日蹙官軍復推其近礮斷其水道番衆恒懼紛紛潰出索諾木遂率其兄弟莎羅奔甲爾瓦沃雜爾斯丹巴及兩土婦并助惡之大頭人丹巴沃雜爾阿木魯綽窩斯甲尼瑪噶喇克巴偕兩喇嘛挈屬二千餘人出寨逆酋跪捧印信羣泥首乞命由是罪人斯得獻俘奏凱方將劓砮搜穴利斧其吭生擒亦易旦夕

滅亡乃始匍匐請命又安得比之肉袒牽羊噶喇依者蓋其世守官寨故多深塹高牆我師萬層險歷千戰威

揚譬之大木已盡去其枝葉則本根亦可待其立殭然而逆賊有言官軍若至當毀其重器聚族焚而自戕使果如所云則雖獻馘歲事終不如生獲盡美盡善之慶是蓋兇渠罪大惡極而且貪生苟延以致獻俘闕下明正典刑於是疆界厥地屯戍我兵鎮羣藩而永靖樹豐碑以告成功歲在丙申仲春日吉時良

陶莊

河神廟碑記

成大事者必有其時事有視若易盡人力而為之然終
於弗成者則以

天弗助

神弗相而非其時也事有視若難盡人力而為之而終
於有成者則以

天所助

神所相而適逢其時也雖然

天助也

神相也無所為告之者也使時有可乘而人弗盡力而為之亦難望其有成也故舉大事者必當審事機乘時會盡人力以敬祈

天助

神相則庶乎奏平成之功三者不可闕一焉吾於陶莊引河益信此理之弗爽陶莊之土逼河南流近清口蓋始自宋時南徙歷元及明不知其幾何年矣於是有黃水倒漾之患於是有藉清敵黃之說然而清水常弱黃

水常勝雖劬補苴終不能得其要領而倒漾自若也
惟我

皇祖聖祖仁皇帝首見及於此康熙己卯歲

南巡時即命開陶莊引河俾遠避清口以除倒灌之患誠釜
底抽薪之計也其後庚辰歲辛巳歲壬辰甲午歲以及雍正
庚戌歲歷任河臣屢挑屢淤於是引河之事遂置而弗

論

康熙己卯春

皇祖南巡

親莅河干閱視形

勢

命於清口迤西隔岸挑治陶莊引河導黃使北

並
因河臣董安國開放過早隨即淤墊庚辰春刑部侍郎

常綬等遵

旨履勘以董安國所挑引河已淤壩亦

毀壞請再挑濬寬深計長七百餘丈辛巳秋河臣張鵬

翮以引河中段淤阻宜加挑濬又運南岸積土於北岸

加挑新河五百餘丈其時黃河僅藉以分流不免沙停

水緩壬辰甲午兩年河臣趙世顯兩次疏濬屢挑屢塞

雍正庚戌北岸長出淤灘遂至大溜南趨全由故道

逮乾隆己未歲予命大學士鄂爾泰視河仍持開引河

之議而河臣河員率以為難行高斌尙稱為善治河者

亦以為功不易就乃創建木龍挑溜北趨圖補偏救弊

之為於是引河之事更罷而無有言及者矣

鄂爾泰請開引河因

訪知前此不成之故遂有河頭若不迎溜河尾若不順
流開放若不及時三者有一於此無能成河之議高斌

正欲興辦適大水驟至不便施工迨汛水消退察看停淤形勢較前低窪恐水長易漫引河難望成功乃建木龍於南岸以挑溜引河之議遂寢然予以為陶莊之引河不開終無救

清口倒灌黃流之善策但南巡四次未至其地用是耿耿於懷適昨歲東巡河臣吳嗣爵蘇州撫臣薩載各來覲因見嗣爵老病遂以薩載易之與之談及河務以為海口淤泥之說終難行至陶莊引河則必宜開而未敢必也命其抵任悉心相視及薩載之任與督臣高晉親履其地測量高下曲直頭尾寬窄繪圖貼說以聞朕復詳酌

形勢以硃筆點記往返相商者不啻數次議既定迺於
去歲九月十六日興工以今歲二月十五日垂春汎水
長之候放流入新河而舊河築攔黃壩以禦之既放之
後新河順軌安流直抵周家莊始會清東下去清口較
昔遠五里於是永免倒灌之患而引河之工成

引河既成薩載

奏河長計一千六十丈其河頭原挑寬四十丈河身河
尾原挑寬三十丈至三十五丈放流後續經將兩涯刷
塌河頭寬至七十餘丈河身河尾寬至五六十丈河底
水深一丈四五尺亦較原挑刷深六七尺云云此實點
邀神相至舊河口既築壩堵流并於陶莊積土外添築
新堤以防外灘漫水及薩載工竣入覲復面諭於新河

河頭下脣至第三架木龍處添壩一道為重門
保障薩載回任旋即興工亦善後最要機宜也
夫自康熙己卯逮今乾隆丁酉歷七十餘歲屢舉而未成及一
舉而遂成者豈非時有可乘不可乘之殊而總賴

天助

神相之所致耶其能訪筮籌畫盡人力而不失事機任
投艱而弗猶豫者則錫賚酬勲國家之典具在至夫
天恩之賜助蓋自始事以迄成功予實晝夜在心默叩
禱謝無可言喻而

河神之佑相非特建

崇祠其何以顯

明旣達羣誠乎爰即新口石壩建廟

妥神俾司事者春秋潔祀以邀惠於無窮並為迎神送神之詞以協律焉

河之舊兮本南每灌清兮黃兼

神之相兮北漸即運河兮賴永恬迎

神之來兮俎豆甘於萬斯年兮恩沛覃

右迎神樂

河之新兮移北既避曲兮就直

神之相兮南塞去清口兮無復逼送

神之還兮帷幕飾於萬斯年兮恒戴德

右送神樂

按記中有河南流近清口始自宋時南徙之語未甚
明確蓋宋史所稱神宗熙寧時河道南徙尋經塞治
即蘇軾河復黃樓諸詩所由作也惟統志所稱金明

昌時河淮并為一瀆之言為今黃河南徙之確據然
彼時有宋存焉淮泗一帶非金所有地當屬之宋此
因今作河復詩考訂而得者則向之所云自宋時南
徙亦未為不可特未詳明言之耳因附書本記後乾
隆庚子清和月作

御製文二集卷二十九

欽定四庫全書

御製文二集卷三十

碑文

七佛塔碑記

七佛偈為禪門開宗了義然散見於梵帙而非出於一
經近自西藏班禪額爾德尼喇嘛處貢有七佛番軸凡
佛之父母眷屬名字悉備問之僧人皆不知其所以誥
之章嘉國師乃於番經漢經所謂長阿含經賢劫經降

生次第經及佛源廣解內一一考得其源蓋第一毘婆尸佛種刹利姓拘利若父槃頭母槃頭婆提居槃頭婆提城神足二一名騫荼次名提舍侍者名無憂子名方膺第二尸棄佛種刹利姓拘利若父明相母光曜居光相城神足二一名阿毘浮次名婆婆侍者名名行子名無量第三毘舍浮佛種刹利姓拘利若父善燈母穉戒居無喻城神足二一名扶遊次名鬱多摩侍者名寂滅子名妙覺以上三佛為過去莊嚴劫佛第四拘留孫佛

種婆羅門姓迦葉父禮德母善枝居安和城神足二一名薩尼次名毘樓侍者名善覺子名上勝第五拘納舍牟尼佛種婆羅門姓迦葉父大德母善勝居清淨城神足二一名舒槃那次名鬱多樓侍者名安和子名導師第六迦葉佛種婆羅門姓迦葉父梵德母財主居婆羅柰城神足二一名提舍次名婆羅婆侍者名善友子名進軍第七釋迦牟尼佛種刹利姓瞿曇父淨飯王母大
清淨居舍衛城神足二一名舍利弗次名目犍連侍者

名阿難子名羅睺羅以上四佛為現在賢劫佛夫一佛
即恒河沙數佛而恒河沙數佛即一佛父母眷屬皆如
是何有於分別然真如海內不受一塵萬行門中不捨
一法既已明是因緣用泐諸貞石建七佛塔以為供養
頌曰

過去莊嚴劫現在賢劫是未來為星宿於一彈指頃佛
說三即一過去三非三現在四豈四分別乃云七而實
即一佛七佛各有偈普說一義諦一毫端之上能現寶

王刹示茲滿月相聚七為一塔如法華所云非同亦非
異佛語非綺語初學亦能曉聲聞與圓覺猶然未能行
稽首吉祥雲永蔭娑婆界救度諸衆生各各精進證

熱河

文廟碑記

丙申夏駐蹕熱河避暑山莊曹秀先以禮部尚書扈從
幾暇召見談及時政秀先云臣春卿也在職言職以為
此處宜興學校以造就士朕曰俞哉亦其時矣於是乎

有設學之旨於是乎有加額之恩學校既設則

文廟亟宜建乃命相地伐材卜吉鳩工宮牆泮水殿廡
禮樂一如制越二年己亥夏朕以來巡親

釋奠而落成之夫熱河固自古關塞以外荒畧之區也
雖金遼有興州之稱然旋舉旋廢建置沿革率不可考
而況有皋比之傳絃誦之聲哉是以我

皇祖每年避暑於此亦不過名之曰山莊故有聚民至
萬家之句蓋於禮樂之興未免

存待以百年之意今則耕桑日以闢戶口日以滋以幅員計之不啻數千里而版藉或逾十萬焉此而無學校以牖民迪俗豈宣

祖猷揚

聖化之道且今西域烏魯木齊等處率置郡縣立學校以此較彼為尤近矣則茲

文廟之建於時於地胥不可緩亦不待人之請而後行稱之曰熱河

文廟者今雖升之曰承德府從其朔紀其因也昔蘇軾作韓愈碑記云公之神之在天下如水之在地中予謂韓愈因文見道我

夫子體道垂文韓愈之所因者即

夫子之所垂而見猶待乎行體則其本也且水在地中尚需求而得之我

夫子乃天之經地之義山之峙海之淵無日不在人人心目之中範圍曲成而不遺豈待穿鑿求之而後得然

則

木鐸之音孰謂不可覺斯民於闕外荒畧之區也哉

須彌福壽之廟碑記

黃教之興以宗喀巴為鼻祖有二大弟子一曰根敦珠
巴八轉世而為今達賴喇嘛一曰凱珠布格埒克巴勒
藏六轉世而為今班禪額爾德尼喇嘛是二喇嘛蓋遞
相為師以闡宗風而興梵教則今之班禪額爾德尼喇
嘛實達賴喇嘛之師也達賴喇嘛居布達拉譯華言為

普陀宗乘之廟班禪額爾德尼居扎什倫布譯華言為須彌福壽之廟是前衛後藏所由分也辛卯年曾建普陀宗乘之廟於避暑山莊之北山以祝

釐也亦以土爾扈特歸順也今之建須彌福壽之廟於普陀宗乘之左岡者則以班禪額爾德尼欲來觀而肖其所居以資安禪且遵我

世祖章皇帝建北黃寺於京師以居第五達賴喇嘛之例也然昔達賴喇嘛之來實以敦請茲班禪額爾德尼

之來覲則不因招致而出於喇嘛之自願來京以觀華
夏之振興黃教撫育羣生海宇清宴民物敕寧之景象
適值朕七旬初度之年並為慶祝之舉也夫朕七旬不
欲為慶賀繁文已預頒諭旨而茲喇嘛之來則有不宜
阻者蓋國家百餘年昇平累洽中外一家自昔達賴喇
嘛之來至今亦百餘年矣且昔為開創之初如喀爾喀
厄魯特尚有梗化者今則重熙休和喀爾喀久為世臣
厄魯特亦無不歸順而一聞班禪額爾德呢之來其歡

欣舞蹈欲執役供奉出於至誠有不待教而然者則此
須彌福壽之廟之建上以揚歷代致治保邦之謨烈下
以答列藩傾心向化之悃忱庸可已乎既為記復作讚
言

印度既迴遙

佛教亦式微

梵僧捨天竺

多臨衛藏地

自唐代已然

是為法源處

一譯猶云近

三垂無舛訛

宗垂向東昌

誠如佛所記

衛藏雖徼外

實在震旦中

達賴及班禪

宗喀巴高弟

前後燃智燈

三車之綱領

真文與滿字

於是溯軌躅

蒙古衆林林

莫不傾心向

皈依三寶門

神道易設教

茲聞班禪來

如嬰兒遇母

觀化闡宗風

誠為吉祥事

布達拉既建

倫布不可少

擇向興工作

亦以不日成

都綱及寢室

一如後藏式

金瓦映日輝

玉幢揚風舞

自成動靜偈

朗標色空喻

以是善因緣

資無礙法喜

祝嘏猶其小

所欣象教宏

舉似西域居

無來亦無去

上人演法輪

蠢蠢普超度

佐我無為治

雨順與風調

衆生登壽世

慧炬永光明

合十作讚言

初非為一已

如懸大圓鏡

徧照於十方

而鏡本無心

迴向亦如是

重修正定隆興大佛寺記

世間一切具體相者有成必有壞有新必有故自金身

以至衆生概不出此然而成其壞則壞為成新其故則故為新所謂如來能轉物衆生被物轉是則重修建立之義所由起而常樂我淨之真身本不繫於成壞新故幻為之體相也正定隆興大佛寺始自隋開皇間至於今蓋千一百餘年其間成壞新故不可屈指數紀其近者則自康熙癸未

皇祖聖祖仁皇帝重修之後逮茲又七十餘年矣日月推遷風雨剝落有所不免地方大吏屢以請且庚子歲

為朕七旬初度之年於是命吏發帑一律普新之沿其

漏者正其向

隆興寺為正定古刹自隋迄今千餘年戊戌歲重發帑命周元理等督修其舊制正

殿與寺門中路面向不對蓋以寺前街路逼仄以致徑庭錯遯亦不知始自何代茲特令更正規制較前閎整矣

貼其危者煥其觀無勞百姓不日而成越明年辛丑

命行春而落成之並攜章嘉國師行慶讚禮西天震旦

二萬里而遙茲古寺之重新得真僧之宣教斯能調御

慧力不期而然如來轉物豈不信乎所謂常樂我淨之

真身不繫於成壞新故幻為之體相益可以明其理而

以重修建立為功德者實是不知第一義諦者矣是為記

國學新建辟雍園水工成碑記

名者實之賓實者名之主為學之方應務其實以漸循其名不可炫其名以致亡其實興學之源綦要於國學國學者天子之學也天子之學曰辟雍諸侯之學曰泮水北京之國學自元歷明以至本朝蓋五百餘年矣有國學而無辟雍名實或不相稱焉雖有建議請復以之

水而格部議至今未復癸卯春始有復建之諭甲辰冬
乃觀新工之竣將於乙巳仲春行釋奠禮遂臨雍以落
成焉夫北京為天下都會教化所先也大典缺如非所
以崇儒重道古與稽而今與居也雖乏水然有不改之
井汲以綆而用之無窮亦在人為之而已於是石之鱗
次見園斯池水之鏡澄見明斯漪殿之據中見隆其棖
橋之通行見接其基上庠下庠雖難考二典之制而東
序西序總不出三代之規則是工之舉也又予知過論

所謂於不可已者仍酌行之之意而物給價工給值原
非勞民動衆之為若夫三老五更之說予以為括於養
老化俗之儀而非天子臨雍所必應並行而不遺者蓋
弗見於詩書乃特出杜氏通典之私耳且予向有三老
五更之說已明闢其謬茲不復綴乎辭雖然予更有所
懼於是舉者夫是舉豈非復古興學之懿有何懼而予
懼之者恐後之人執予復古之說於一切衣冠典禮皆
欲效漢人之制則予為得罪

祖宗之人匪教伊虐甚慮不宜也予之子孫臣庶體予此心於可復古者復之其不可復者斷不可泥古而復之夫徒慕復古之虛名而致有忘

祖宗之實失非下愚而何予不為也予敬以是告子孫以保我皇清萬年之基也

蘭陽睢寧新隄南岸

河神廟碑記

中州

河神廟之建於北岸者二曰武陟曰蘭陽建於南岸者
一曰中牟皆以禦災捍患有功德於民而崇祀者也茲
蘭陽睢寧之間新隄南岸復建

河神廟者何乾隆四十九年秋八月河決睢州下汎二
堡命大學士阿桂馳往會同兩江總督薩載南北總河
李奉翰蘭第錫河南巡撫何裕城五臣會勘詳議築塞
并選帶南河熟練河工員弁赴豫俾資調遣嗣據奏請
改築南隄并開挑引河自蘭陽至商邱長一百四十餘

里朕按圖審勢復命向北展寬引河因即取土築隄為
一舉兩得之計阿桂等遵旨督辦冬十一月引河成初
五日啟放掣溜通暢至十四日夜東壩陡向西蟄直抵
西壩底埽遂乘勢鑲壓至十七日金門旋即斷流天然
合龍全河大溜盡歸引河是役也

天庥

神佑與庚子年儀封之天然合龍正同在事文武員弁
以及遠近士民觀者無不踴躍歡忭額手稱慶以為非

河神嘉佑不及此也夫

神之靈盈天地間臨之在上質之在旁昭布森列無所往而不在而人之依於

神將以邀福致敬冀遂其瞻仰祈籲之私者則非特建崇祠無以昭

靈貺達羣誠爰命阿桂等度地於蘭陽睢寧新隄南岸適中之處鳩工飭材鼎新

廟貌就南岸者所以別於北岸也蘭陽睢寧之間者所

以別於武陟中年也當睢州下汎之初決方以漂毀田
廬為亟且以稽工曠日為虞蓋自始事以迄成功予之
晝夜齋心默禱無可言喻凡賑助撫卹和雇加價不靳
千百萬帑金以拯濟我災黎而在事諸臣之竭誠襄事
與我民之奔走役作子來恐後實亦不遺餘力是以昨
冬合龍誌事詩云天然忽報合龍信

神佑應憐衆力殫蓋不敢謂予之盡心於民而實

神之篤眷於予也且豫省頻歲不登自昨冬睢工合龍

後今歲夏秋來連獲甘霽晚禾補種秋苗長發轉歉為
豐是

神之篤眷於予實

神之保乂吾民也繼自今亦惟虔鞏孜孜永祈

安瀾之錫以與吾民邀福於無疆耳廟工成遂書緣起
以勒於石

御製文二集卷三十

欽定四庫全書

御製文二集卷三十一

書事

書高士傳披裘公事

晉皇甫謐著高士傳凡九十人其記披裘公也則以季子令取遺金投鏹瞋目而言曰五月披裘負薪豈取金也哉季子驚謝而問姓名云云始讀而低不知所謂既思而哈笑其驚於竒而晦於不知時也其意曰披裘公

安貧樂道者耳夫冬而葛不能有裘也則樂之是安其所樂也夏而裘不能有葛也亦樂之是樂其所不必安也葛易有而裘難有炎易禦而寒艱禦不能具葛獨不可脫其裘乎然則披裘公反為趨炎者乎不然則其性情特殊於人而好為奇異以沽譽者乎是大不然也余故笑其驚於奇而晦於不知時也至夫王倪齧缺諸說益失不經宜例以夫子之不語可耳

書史記漢高帝論蕭曹等事

史記載高帝論蕭曹等事膾炙人口率以為呂氏之禍
高帝若先知而終令平勃安劉者然嗚呼世之好奇而
不槩之以理有如是哉夫高帝素稱知人善任而蕭曹
輩五人又其所與共患難日夜諮諏庶事者有不知之
悉而論之當乎若夫呂氏之禍高帝所不期也呂氏之
妬高帝則誠知之然亦不料其日後狼藉若彼之甚也
徒以微時結髮惠帝復年長是以割愛而立之此高帝
之躓也使帝預知必有後日之禍幾於移漢祚焉則帝

權其輕重廢呂氏立趙王且遂其願以高帝分羹之忍
何不可為而獨顧惜呂氏徒令周勃為太尉以救漢祚
於可存不可存之間雖愚者不肯為顧高帝肯為之哉
余故曰世之好奇而不槩之以理有如是哉失之毫釐
繆以千里司馬遷蓋不能辭其責矣

書黃庭堅為母滌溺器事

明屠隆書二十四孝圖蹟稱黃庭堅性至孝身既顯貴
仍為母滌溺器此事正史不載隆蓋私竊史記石建取

親中裙廁愉身自浣滌移之於堅炫以為奇而不知其實失正道也夫大孝莫過於舜與曾子矣舜與曾子不聞有此也子夏曰雖小道必有可觀者焉致遠恐泥蓋謂此耳且蓬戶甕牖貧窶之人家無次丁孰不為其親滌器是盡可謂之孝乎既至貴顯則孟子所謂居移氣養移體祿位足以榮父母奴婢足以供使令豈必躬自滌器而後為孝乎躬自滌器以為孝斯不啻徒盡小節乃務為奇名炫世背常經而失正道將知其必有不能

盡孝之大者矣吾惜夫蓬戶甕牖者雖有過此之節不得稱孝又鄙夫身既顯貴者區區炫竒節而以孝稱馬遷所云非附青雲之士惡能施於後世吁是即馬遷之所以取榮也歟抑亦馬遷之所以取辱也歟

書明臣史可法復書睿親王事

幼年即羨聞我攝政睿親王致書明臣史可法事而未見其文昨輯宗室王公功績表傳乃得讀其文所為揭大義而示正理引春秋之法斥偏安之非旨正辭嚴心

實嘉之而所云可法遣人報書語多不屈固未嘗載其書語也夫可法明臣也其不屈正也不載其語不有失忠臣之心乎且其語不載則後世之人將不知其何所謂必有疑惡其語而去之者是大不可也因命儒臣物色之書市及藏家則亦不可得復命索之於內閣冊庫乃始得焉卒讀一再惜可法之孤忠嘆福王之不惠有如此臣而不能信用使權奸掣其肘而卒致淪亡也夫福王即信用可法其能守長江為南宋之偏安與否猶

未可知而况燕雀處堂無深謀遠慮使兵頓餉竭忠臣
流涕頓足而歎無能為惟有一死以報國是不大可哀
乎且可法書語初無詬誅不經之言雖心折於睿王而
不得不強辭以辯亦仍明臣尊明之義耳余以為不必
諱亦不可諱故書其事如右而可法之書並命附錄於
後夫可法即擬之文天祥實無不可而明史本傳乃稱
其母夢文天祥而生則出於稗野之附會失之不經矣
附史可法復睿親王書

南中向接好音法隨遣使問訊吳大將軍未敢遽
通左右非委隆誼於草莽也誠以大夫無私交春
秋之義今倥偬之際忽捧琬琰之章真不啻從天
而降也循讀再三殷殷至意若以逆賊尚稽天討
煩貴國憂法且感且愧懼左右不察謂南中臣民
媿安江左竟忘君父之怨敬為貴國一詳陳之我
大行皇帝敬天法祖勤政愛民真堯舜之主也以
庸臣悞國致有三月十九日之事法待罪南樞救

援無及師次淮上凶問遂來地坼天崩山枯海泣
嗟乎人孰無君雖肆法於市朝以為泄泄者之戒
亦奚足謝先皇帝於地下哉爾時南中臣民哀慟
如喪考妣無不拊膺切齒欲悉東南之甲立翦凶
仇而二三老臣謂國破君亡宗社為重相與迎立
今上以繫中外之心今上非他神宗之孫光宗猶
子而大行皇帝之兄也名正言順天與人歸五月
朔日駕臨南都萬姓夾道歡呼聲聞數里羣臣勸

進今上悲不自勝讓再讓三僅允監國迨臣民伏
闕屢請始以十五日正位南都從前鳳集河清瑞
應非一即告廟之日紫雲如蓋祝文升霄萬目共
瞻欣傳盛事大江湧出桺梓數十萬章助修宮殿
豈非天意也哉越數日遂命法視師江北刻日西
征忽傳我大將吳三桂借兵貴國破走逆成為我
先皇帝后發喪成禮掃清宮闕撫輯羣黎且罷薙
髮之令示不忘本朝此等舉動振古鑠今凡為大

明臣子無不長跼北向頂禮加額豈但如明諭所云感恩圖報已乎謹於八月薄治筐篚遣使犒師兼欲請命鴻裁連兵西討是以王師既發復次江淮乃辱明誨引春秋大義來相詰責善哉乎推言之然此文為列國君薨世子應立有賊未討不忍死其君者立說耳若夫天下共主身殉社稷青宮皇子慘變非常而猶拘牽不即位之文坐昧大一統之義中原鼎沸倉卒出師將何以維繫人心號

召忠義紫陽綱目踵事春秋其間特書如莽移漢
鼎光武中興丕廢山陽昭烈踐祚懷愍亡國晉元
嗣基徽欽蒙塵宋高繼統是皆於國仇未翦之日
亟正位號綱目未嘗斥為自立率以正統與之甚
至如元宗幸蜀太子即位靈武議者疵之亦未嘗
不許以行權幸其光復舊物也本朝傳世十六正
統相承自治冠帶之族繼絕存亡仁恩遐被貴國
昔在先朝夙膺封號載在盟府寧不聞乎今痛心

本朝之難驅除亂逆可謂大義復著於春秋矣昔契丹和宋止歲輸以金繒回紇助唐原不利其土地況貴國篤念世好兵以義動萬代瞻仰在此一舉若乃乘我蒙難棄好崇讐規此幅員為德不卒是以義始而以利終為賊人所竊笑也貴國豈其然往先帝軫念潢池不忍盡戮勦撫互用貽誤至今今上天縱英明刻刻以復仇為念廟堂之上和衷體國介冑之士飲泣枕戈忠義民兵願為國死

竊以為天亡逆闖當不越於斯時矣語曰樹德務
滋除惡務盡今逆成未服天誅諜知捲土西秦方
圖報復此不獨本朝不共戴天之恨抑亦貴國除
惡未盡之憂伏乞堅同仇之誼全始終之德合師
進討問罪秦中共梟逆賊之頭以洩敷天之憤則
貴國義問昭耀千秋本朝圖報惟力是視從此兩
國世通盟好傳之無窮不亦休乎至於牛耳之盟
則本朝使臣久已在道不日抵燕奉盤盂從事矣

法北望陵廟無涕可揮身蹈大戮罪應萬死所以
不即從先帝者實惟社稷之故傳曰竭股肱之力
繼之以忠貞法處今日鞠躬致命克盡臣節所以
報也惟殿下實昭鑒之

書通鑑輯覽明崇禎甲申紀年事

通鑑輯覽將成司事者舉通鑑綱目三編之例於甲申
歲欲大書順治元年分注崇禎十七年於下且凡勝朝
事皆別書明而於李自成陷京師即繫以明亡余曰不

可夫三編之例非述續編之例乎續編於元順帝二十七年即分注明年元主北奔而繫以元亡去至正二十八年為洪武元年且自順帝十五年明祖起兵之後於凡元政即別書元以示異雖臣各私其君之義也而朕實鄙之蓋以理責人者必先以理自處天下者天下之天下非一家之天下也言悖而出者亦悖而入居今之時貶亡明而尊本朝如明之於元其誰曰不可然朕不為也通鑑輯覽之書非一時之書乃萬世之書於正統

偏安之繫必公必平天命人心之嚮必嚴必謹且正編續編既一正其自視尊大之陋習而顧於本朝嬪代之際有所偏向是不有恧於心而貽來世之譏乎茲於甲申歲仍命大書崇禎十七年分書順治元年以別之即李自成陷京師亦不遽書明亡而福王弘光元年亦令分注於下必俟次年福王於江寧被執而後書明亡夫福王設於江南能自立未嘗不可為南北朝如宋高宗之例也而柰其日即愒淫以致天命去而人心失是非開

初者欲究我兵威而實守成者自失其神器也若夫唐
王桂王窮竄邊隅苟延旦夕此正與宋之帝昺帝昀同
例不可仍以正統屬之用以示萬世守成之主思天命
人心之難諶凜凜乎惴惴乎保祖宗所貽留為臣民所
繫屬而不敢謬恃書法之可有高下焉庶幾朕纂通鑑
輯覽之本意或不失春秋大一統之義乎

書蜀志諸葛亮傳七縱七禽事

諸葛亮本王佐材而世或謂其事為神奇不折衷於正

道致使鹽梅匡濟之器流而為黃冠術士之儕則一失
之於陳壽之挾讐多貶詞一失之於裴松之之無學濫
引注怪哉史筆已難得而付之挾讐無學之流則其事
尚可問哉且以覓米不與即不為立傳之人而望其能
通世理具正辭以紀如管樂器人之本末心蹟不猶北
轅而適越乎諸葛亮之事不可枚舉即如先主永安數
語孫盛已斥其非是茲姑弗論其征孟獲也正傳謂三
年春亮率衆南征其秋悉平軍資所出國以富饒夫亮

之表固云深入不毛矣彼不毛之地何致出軍資而饒國計至於裴松之引習鑿齒漢晉春秋為注乃云七縱七禽之夫一陣之頃固無七縱七禽之理若縱之去而復為陣戰以禽之則蠻烟瘴嶺之間如是七往返勢必曠日持久何能春出而秋還亮之表又云並日而食矣三軍儲恃何所取資此實事之必無而世反以此訝之為至神仰以為至奇耳食口傳羣然不以為怪至於亮之扶持危國鞠躬盡瘁以事其主之誠或鮮豔稱者豈

非陳壽裴松之之罪哉嗚呼讀史者其能具卓識酌正理不為遊辭所誤者亦實希矣

書司空圖論封建事

王應麟著困學紀聞其攷史類有云司空圖謂房瑄建親王分鎮天下議肅宗以是疑瑄受讒廢先是安祿山見分鎮詔書拊膺歎曰吾不得天下矣夫明皇雖從瑄議何嘗免西蜀之幸長安之陷若瑄之得罪實以誤用古戰法敗於陳濤斜其時帝雖恨瑄喪師眷任未衰後

始以挾黨背公出為刺史則瑄之廢乃有以自取豈因
賀蘭進明之譖哉蓋分鎮即封建之意司空圖猶惑於
劉頌封建之說且阿其所好遂以為瑄廢被屈耳封建
之不可行柳宗元蘇軾言之詳矣茲不復論獨論司空
圖之不達事理未免揜不善以著其善而王應麟採而
錄之津津然若有惜乎瑄之去者雖善善欲長之義哉
然未免重耳食而無目光矣

書唐太宗欲觀實錄事

唐太宗欲觀實錄而褚遂良不與觀後卒令房元齡上而觀之夫太宗英明之主也而何獨於此事乃憤憤若是乎人君言行即史官不記天下皆記之矣豈得遍天下之人索其記而觀之今太宗之言曰欲知前日之惡為後來之戒苟其謹言慎行雖不觀實錄可也苟其恣意妄為則今日觀之明日忘之雖百觀實錄無益也且太宗納巢刺王妃失德之甚者而新舊書本紀皆無此非史官所紀載者乎由是觀之遂良已不能逃為其君

隱之罪則謬為不與觀之言為能彰其直乎綱目於是條下又注上見書六月四日事語多微隱謂元齡云云猶是史臣欲揜其不善而著其善之意所謂欲蓋彌彰胥不足為訓耳

書南宋論兵事

南宋棄河北而不守忍二帝而弗顧志恢復而知兵者莫過岳飛一人以讒誅之是尚可與言兵哉而最可笑者莫若上皇與吳璘相論之事宋史稱上皇嘗問勝敵

之術於璘對曰弱者出戰强者繼之上皇曰此孫武子
三駟之法一敗而二勝吁其識之鄙可怪哉夫亦知孫
武子三駟之法乎彼教田忌與諸公子置馬較射此尋
常賭金為戲以是法相馳固當一不勝而再勝在馳射
較勝負則佳而豈可以用之於行軍乎且是法也市井
博奕之徒無不知之亦不得謂孫武子行軍妙算也夫
兩軍對敵所貴先聲其勝敗祇在呼吸頃耳以大為小
以強為弱不過俯仰之間今以弱者出戰以當敵之強

者跌而不振後之强者亦將望風而敗又豈能收兩勝之功哉若夫臨敵出奇制變或先示之以弱而繼以强勇之兵擣其虛則可要非對戰時當使弱者居前而强者繼後也昔宋楚泓之戰襄公稱先道古言之非不疊疊而卒致於敗為天下笑予謂高宗之舉孫武子其亦類於此矣

書通鑑宋太祖云守財事

宋太祖禁永寧公主服貼繡鋪翠襦及斥皇后稱黃金

裝輿意在崇儉似矣而所云為天下守財之言予不得
無鄙焉蓋守者保而有之又聚而儲之之謂也易曰何
以守位曰仁何以聚人曰財傳曰財散則民聚但聞守
位未聞守財且欲聚民必當散財今曰為天下守之則
民何以聚乎其意若曰為天下守財將以散之於民則
何不曰守此財以與民亦見其以辭害義矣且措大之
語非藝祖所云乎斯語也措大者流必咨嗟嘆賞以為
名談而實不宜出諸天子之口有如馬援守錢虜之誚

耳予即位四十年之間凡兩免天下正供一免天下漕糧而水旱蠲賑又不啻數千百萬故直鄙藝祖之言而不愧若其已不知節儉濫賜近倖而弗博施黎庶者其視藝祖又相去遠矣

御製文二集卷三十一